

Itilliarsoop ikerasaliordfigineqarnissaa piviusunngorteqqullugu Naalakkersuisut suliamik aallartitseqqullugit peqquneqarnissaannik Inatsisartut aalajangiiffigisassaattut siunnersuut. Ikerasaliaq Nordstar 30-mit assigisaanilluunniit aqputigineqarsinnaasunngorlugu itissusilerneqarlunilu silissusilerneqassaaq.
(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerpeqarnera

Sanaartornermut Ataatsimiititaliap aalajangiiffigisassatut siunnersuummik suliaqarneranut, Naalakkersuisut sinnerlugit Sanaartornermut Ataatsimiititaliap aallarniutigalugu qutsavigaara. Ataatsimiititaliami amerlanerussuteqartut allannguutissatut siunnersuutigisaat, Naalakkersuisut tusaatissatut tiguaat.

Ataatsimiititaliami amerlanerussuteqartut tulliuttumi allannguutissatut siunnersuut akuersissutigineqassasoq inassutigaa:

”Itilliarsoop ikerasaliordfigineqarnissaanut missingiummik c-mik juli 2022 nallertinnagu saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Ikerasaliaq Nordstar 30-mit assigisaanilluunniit aqputigineqarsinnaasunngorlugu itissusilerneqarlunilu silissusilerneqassaaq.”

Aalajangiiffigisassatut siunnersuummik tassanga ataatsimiititaliap suliaqarnerani, malitsigisaanillu isumaliutissiissutigisaani paasinarsivoq, pissutsit arlallit sulii qulaajarneqarsimangitsut. Immikkoortup matumap ataatsimiittarfimmi maani siullermeerneqarnerani eqqartuinititut, akisussaaffiit nammatassallu Naalakkersuisut kommunillu akornanni agguataarneqartussat pineqarput. Suliniutip piviusunngortinneqarnissaanut aalajangiisuusinnaalluni, pinngortitamut kinguneqaataasussat misissoqqissaarneqarnissaat aamma pineqarpoq.

Ataatsimiititaliap kaammattuutigaa, akisussaaffiit nammatassallu agguataarneqarnissaat pillugit kommunit eqqartueqatiginissaat Naalakkersuisut salliutissagaat, immikkoortortakkaartumillu pilersarusiornissamut periarfissaq eqqartuinnermut tassunga aamma ilanngutissagaat. Tassunga tunngatillugu Sanaartornermut Ataatsimiititaliap ataavartumik malinnaatinneqarnissani kissaatigaa, tamannalu Naalakkersuisut soorunalimi naammassissavaat.

Akisussaaffiit nammatassallu agguataarneqarnissaat pillugit kommunit januaarimi oqaloqatigineqarsinnaassasut naatsorsuutigineqarpoq.

Inatsisartut matumani aalajangiinissaannut atatillugu nalilernerqartariaqartut Naalakkersuisut naliligaannik, 2022-mi juuli tikitsinnagu missiliuut c-mik suliaqarnissamik Sanaartornermut Ataatsimiititaliap siunnersuuteqarnera ajoraluartumik naleqqutinngitsortaqarpoq.

Missiliuut c-mik suliaqarnissamik pinngitsoorneqarsinnaanani misissueqqissaarnissaq aasaanerani ingerlanneqassaaq, taamaalillunilu missiliuut c 2022-mi juuli tikitsinnagu piareerneqarsinnaanani.

Missiliuut c suliarigaanni aamma pilersaarusiortoqartariaqarpoq, tamatumalu kingunerisaanik tassunga naatsorsuutigisamik aningaasartuutissat 6 millioner koruunit missaanniissallutik. Taamaalilluni aningaasartuutissat ima annertutigilerput, aningaasalersuinissaq pilersaarusiorneqartariaqarlunilu naligiissaarluarneqartariaqarluni. Tassunga ilanngullugu aningaasat nunatta karsianit aningaasaliissutigineqassappata, suliap suliarineqarnissaanut aningaasaliissutissat Aningaasaqarnermut Akileraartarnermullu Ataatsimiititaliaq aningaasaliissutigissavai.

Taamaattumik Naalakkersuisut nalilerpaat, suliap aningaasalersorneqarnissaa aallaqqaataaniilli inissinneqartariaqartoq. Taamaassappat kommunit peqataatinneqartariaqarput, suliamullu tassunga pisariaqartumik tulleriarinissaannut, isummernissaannullu pisariaqartumik piffissaqartinneqartariaqarlutik.

Tamanna tunuliaqutaralugu tulliuttumi allannguutissatut siunnersuut saqqummiunneqarpoq:

”Suliaq kommunit peqatigalugit eqqartorneqareerpat, Itilliarsummi ikerasaliornissamut tunngavissiisinnalluni aningaasalersuinissamik pilersaarummik UKA2022-mi saqqummiussinissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Itissusilerneqarlunilu silissusilerneqarnissaanut tunngatillugu Nordstar 30, assingusorluunniit uuttuutitut atorneqarsinnaavoq.”